

PURWANING BAWOS

OM SWASTYASTU,

Antuk penugrahan Ida Sang Hyang Prawakawi, penyuratan awig – awig Desa Adat Pedungan puniki prasida memargi becik tur ngemolihang paikup bawos. Penyuratan awig – awig puniki medasar antuk pararem Krama Desa Adat Pedungan.

Duk paruman inucap, kapariangkenan mangda awig – awig Desa Adat Pedungan kasurat. Kawentenan awig – awig ring sajeroning desa adat wantah mabuwat pisan, santukan awig – awig puniki mawasta sepat siku – siku sane pacang keanggen titi pengancan miwah sasuluh antuk warga desane sami saha prajuru ipun, ring sajeroning kasukertan desa miwah raga, sekala miwah niskala.

Ring awig – awig puniki keunggahang bantang – bantang sane mabuwat kewanten, mangdaning kawentenan nyane ajeg mungguwing penyahbah miwah carang, uparengga ipun sane gelis nunjuk lungsur manut kawentenan desane patut kaunggahang ring pararem miwah pasuwara.

Akeh para manggala miwah sameton sane sewosan micayang wantuan arta miwah wantuan pikayun, ring sajeroning nyurat awig – awig puniki. Titiang Bendesa Adat, pinaka wakil krama Desa Adat Pedungan, ngaturang suksemaning manah ring sapa sira ugi sane sampun micayang wantuan inucap.

Mogi – mogi Ida Sang Hyang Pramakawi mapaica panugrahan ring Ida Dane inucap ring ajeng.

OM CANTIH, CANTIH, CANTIH, OM

DAGING AWIG – AWIG

PURWANING BAWOS.....	1
DAGING AWIG – AWIG.....	2
MURDHA CITTA	4
PRATAMAS SARGA	Aran lan Wewidangan Desa 5
DWITYAS SARGAH.....	Patitis lan Pamikukuh 7
TRITYAS SARGA	Sukerta Tata Adat 8
Palet 1 Indik Krama	8
Palet 2 Indik Prajuru	13
Palet 3 Indik Paruman.....	16
Palet 4 Indik Kukul.....	19
Palet 5 Indik Padruen Desa.....	21
Palet 6 Sukerta Pamitegep	22
CATURTAS SARGAH	Sukerta Tata Agama 26
Palet 1 Indik Dewa Yadnya.....	26
Palet 2 Indik Rsi Yadnya.....	28
Palet 3 Indik Pitra Yadnya.....	29
Palet 4 Indik Manusa Yadnya.....	31
Palet 5 Indik Bhuta Yadnya.....	31

PANCAMAS SARGAH	Sukerta Tata Pawongan	33
Palet 1 Indik Pawiwahan		33
Palet 2 Indik Nyapihan		35
Palet 3 Indik Sentana		37
Palet 4 Indik Warisan		38
SAD SARGAH	Wicara lan Pamidanda	39
Palet 1 Indik Wicara		39
Palet 2 Indik Pamidanda		40
SAPTAMAS SARGAH	Nguwah Nguwahin Awig – awig	41
ASTAMAS SARGAH	Pamuput	41
PRAMA WACANA		43
Pratamas Sargah	Pararem Penyacah Awig	43
Dwitiyas Sargah	Pararem Pengele	45
Tritiyas Sargah	Pararem Penepas Wicara	47

AWIG – AWIG DESA ADAT PEDUNGAN

MURDHA CITTA

AUM, OM

Om Swastyastu, Om Awighnamastu nama sidham.

Pamutus Paseban Krama Desa Adat Pedungan, Gunawe Awig – awig Desa Maka Sepat Siku – siku, Pematut, Wastu Kasidhan Prayojanan Mami Kabeh, Prasama Anginep Muwah Amanggehaken Kadi Linggih Awig – awig puniki.

PRATAMAS SARGAH
ARAN LAN WEWIDANGAN DESA
PAWOS 1

1. Desa Adat Puniki mawasta Desa Adat Pedungan

2. Wawengkon wewidangannya, mawates nyatur desa :
 - ha. Sisi Wetan : Desa Adat Sesetan Denpasar Selatan
 - na. Sisi Kidul : Segara Benoa
 - ca. Sisi Kulon : Desa Adat Pemogan lan Kapaon
 - ra. Sisi Lor : Desa Adat Denpasar Barat.

3. Wewengkon wewidangan desane manut dresta luwire :
 - ha. Pupulan karang paumahan sinanggeh palemahan desa adat
 - na. Setra, Sawah miwah Tegal, ring wawengkon wewidangan desa sejabaning palemahan desa adat, manggeh telajakan desa. Sewosan inucap taler ngeranjing Marga Agung, Rurung wiadin Telabah, utawi Got, Pengutangan / Pengembahan Toya lan Segara.
 - ca. Genah Suci luwire : Pura Kahyangan Tiga, Pedadyan, Panti/Paibon miwah Sanggah / Merajan

PAWOS 2

1. Desa Adat Pedungan kepeah dados 14 Banjar Adat luwire :
 - ha. Banjar Adat Kaja Pedungan
 - na. Banjar Adat Pande
 - ca. Banjar Adat Karang Suwung
 - ra. Banjar Adat Kepisah
 - ka. Banjar Adat Menesa
 - da. Banjar Adat Puseh
 - ta. Banjar Adat Sawah
 - sa. Banjar Adat Begawan
 - wa. Banjar Adat Sama
 - la. Banjar Adat Geladag
 - ma. Banjar Adat Pitik
 - ga. Banjar Adat Dukuh Pesirahan
 - ba. Banjar Adat Ambengan
 - nga. Banjar Adat Pesanggaran
2. Wantah wewidangan palemahan banjare manggehang antuk peparuman desane.
3. Antuk ring unjuk cacah jiwane pawongannya pahpahan banjar, rawuhing wates wewidangannya wenang keuwah manut pamutus paruman desa.
4. Banjare patut maduwe piranti – piranti, pemaksannya, bale banjar miwah kulkul.
5. Banjare wenang kepeah dados tempekan manut pararem banjar.

PAWOS 3

1. Banjare wenang ngardi awig – awig miwah pararem – pararem maka pamikukuhnyane.
2. Awig – awig miwah perarem-perarem Desa Adat ten wenang lempas ring awig-awig miwah perarem desane, saha taler kalingga tangnin antuk Bendesa, maka pamikukuh dumogi dados lumaksana.

DWITYAS SARGAH

PATITIS LAN PAMIKUKUH

PAWOS 4

Desa Adat Pedungan ngemanggehang pamikukuh :

1. Pancasila
2. UUD 1945
3. Tri Hita Karana

PAWOS 5

Luwire Patitis Desa Adat Pedungan :

1. Mikukuhin miwah ngajegang Sang Hynag Agama
2. Nginggilang tata prawertine meagama
3. Ngerajegang tata sangkaraning pawongan, pemekas sane ngiket pakulawargan.
4. Ngerajegang kasukertan desa, saha pawongan sami sekala niskala.
5. Ngerajegang kasukertan saraja druwening desa miwah druwening pawongannya sami.

TRITYAS SARGAH
SUKERTA TATA ADAT
PALET I
INDIK KRAMA

PAWOS 6

1. Sahaning sang jenek mapaumahan ring Desa Adat Pedungan sinanggeh Krama / Warga Desa Adat Pedungan.
2. Warga Desa inucap linggihnya wenten kalih soroh :
 - ha. Warga sane meagama hindu tur ngeranjing mekrama, sinanggeh krama desa.
 - na. Sewosan punika sinanggeh tamu.

PAWOS 7

1. Sahanan warga desa sane sampun merabian, patut ngawit tedun mekrama desa.
2. Satunggal krama manut karandahan kulawarganya patut keni ayah, sinalih tunggil :
 - ha. Ayah ngarep
 - na. Ayah balu
 - ca. Ayah ngarep sane sampun sentananya merabian, wenang nyaluk ayahnyane, keseledihin olih sentananya inucap.

PAWOS 8

1. Kulawarga meagama hindu wiwitan waga desa sewosan, wenang ngranjing mekrama desa, prade pacang jenek mapaumahan ring wewidangan wewengkon Desa Adat Pedungan.
2. Sane pacang ngranjing kadi ring ajeng, atur supeksa, ring Kelihan Banjar sang ngawidangin genah paumahannya, atur inucap ring ajeng kadulurin antuk ilikita saking banjar/desa wiwitannya ngenenin indik paukudannyane saha naur linggih manut pararem banjar utawi desane.

PAWOS 9

1. Sahananing warga desa sane sampun Anom miwah Deha, sowang – sowang patut ngayah, kawastanin ayah Teruna (sane lanang) miwah ayah Deha (sane istri).
2. Ayah Teruna miwah Deha puniki kepupulang ring Sekeha Teruna miwah Sekeha Teruni/Deha.
3. Sekeha puniki kepah manut bebanjaran.

PAWOS 10

1. Desa miwah bebanjaran mepaweh leluputan ayah utawi pakenan-kenan ring sang inggilang linggah utawi sang kawelas asih.
2. Sejabaning Prajuru Desa saha patut polih leluputan pamekasnya :
 - ha. Para Sedaka
 - na. Para Pemangku Kahyangan Tiga
 - ca. Sang Sakti Tahunan
 - ra. Wang Cuntaka Banget (sakit ila)
 - ka. Wang Alit Ubuh

PAWOS 11

1. Swadarmaning krama desane luwire ;
 - ha. Tinut atuang ring desa
 - na. Tinut saturut ring sedaging awig – awig, pararem miwah penguwet – nguwet desa sewosan.
 - ca. Tan maren ngutsahayang mangda desane nyidayang nyujur tetujonnya kadi munggah ring pawos 5 ring ajeng.
 - ra. Natak panes tis pekertin desane.
2. Wang Desa sinangguh Tamiu patut : \
 - ha. Tinut ring tetuwek desane ngenenin indik sukertan desane ring sakala.
 - na. Tan wenten nungkasin pekertin desane.

PAWOS 12

1. Patyas Krama Desa luwire wenang polih pangayom prajuru manut dresta :
 - ha. Sang ngaksara kauripannya sane mabuwat, sane mastikayang iketan sulur pakulawarga.
 - na. Kasukertan miwah kesucian dewek, parahyangan miwah karangnyane.
 - ca. Kasukertan druwen nyane sowang – sowang
 - ra. Kabawosin tur ketiwakin pamutus sahanan wicarannya
2. Sahanan warga desa rawuhing sang sinanggeh tamiu, wenag polih pasayuban ngemanggehang kasukertan raga, agama, saha druwenyane sowang – sowang.

PAWOS 13

1. Sahanan krama sane ngerobang utawi ngajak anak sewosan lempas ring drestaning pakulawargan upami :
ha. Ngajak wang duduk – dudukan
na. Nyama mulih saking mekurenan
ca. Jadma masudulang dewek
ra. Rowang pastika jenek miwah sane sewosan, patut atur uning ring kelihannya.
2. Pasadok ring ajeng kadulurin antuk kawedarang pastika ngenenin linggah, arta brana miwah tetegenan kramane kalih sang keajak inucap
3. Kramane sang ngeroban/ngajak, patut tanggung sumakuta, negenang lampah sang keajak arepe ring kesukertan banjar utawi desane
4. Kelihan banjare ngunggahang pasadok punika ring ilikitannyane, saha nyobyahang ring paruman banjar.

PAWOS 14

1. Krama sane nampi tamiu jenek awengi, patut mesadok ring kelihan banjarnya.
2. Prade tamiu pacang madunungan jantos langkungan ring awuku, prajuru patut nureksain pisan mungguing makabuatannyane miwah surat wedaran
3. Bilih – bilih yan pacang madunungan, jantos sasihan utawi tahunan suwennyane, patut kaunggahang ring ilikita banjar, tur dunungan inucap patut sareng nedunin masuka duka.

PAWOS 15

1. Tedun mekrama desa, kalih ngetang paroban sahanan ayahan, ngawitin nangken Galungan, sejawaning ngawitin ayah balu ketang pramangkin.
2. Sahanan wusan mekrama desa ketang pramangkin.
3. Nangken ayahan panemaya inucap (Galungan), kelihan banjar sowang – sowang ngawentenang ngacah jiwa, indik desa miwah ayah-ayahan kadi ring ajeng (1), ring wewidangannyane sowang – sowang.
4. Kapastikayang sumeken cacah jiwa, indik desa miwah ayah – ayahan kapikukuhin antuk pamutus paruman banjar sowang – sowang dumogi kengin kelaksanayang.
5. Kasumeken inucap digelis kesukertan ring ilikita (pipil) utawi kartu krama.

PAWOS 16

1. Sinalih tunggil kulawarga mekrama desa, prade kulawarga inucap :
 - ha. Megingsir linggih saking wewidangan Desa Adat Pedungan, sang wusan mekrama sangkaning megingsir linggih patut tur ilikita pastika saking prajuru banjar utawi desa.
 - na. Kanoroyang antuk desane, risampun nyalanang papuikan selami 3 warsa tur taler tan ngehehin solah maprewerti.
2. Sulur tur tata nganoroyang :
 - ha. Pastika wenten sudosan ipun
 - na. Tan tinut ring pituduh prajuru indik nyupat raga ngehehin solah maprewerti.
 - ca. Ketiwakang pamidanda norone antu paruman desa, risampun kapastika antuk saksi, ilikita, bukti antuk Bendesa.
 - ra. Mamidanda nganoroyang inucap katur ring Guru Wisesa.

3. Sang wusan mekrama tan wenten polih pahpahan sangkaning druwen Desa utawi Banjar.
4. Dosane wusan mapaweh, pasayuban kasukertan sekeluwire, arep ring sang kanoroyang.
5. Banjar – banjar sawewengkon Desa Adat Pedungan tan wenang nampi wang kanoroyang.
6. Sang Kanoroyang inucap ring ajeng kengin kateduning malih mekrama maduluran nutug ayah utawi nawur linggih (batu-batu) sepatutipun (manut pararem).

PALET 2
INDIK PRAJURU
PAWOS 17

1. Desa Adat Pedungan kaenterang olih Bendesa.
2. Banjar miwah tempekan kaenter antuk Kelihan Banjar miwah Kelihan Tempek sowang – sowang.
3. Bendesa Adat, Kelihan Banjar miwah Kelihan Tempekan keadegang melarapan antuk pemilihan olih parumannyanane sowang – sowang nyabran 5 (limang) warsa.
4. Sahanan kelihan patut mawiwit krama ayahan ngarep.

PAWOS 18

1. Bendesa miwah Kelihan Banjar sowang – sowang kesanggra antuk :
 - ha. Pangliman pinaka wakil
 - na. Penyarikan pinaka juru tulis
 - ca. Pasedahan pinaka pengemong druwen desa
 - ra. Kasinoman pinaka juru arah
 - ka. Pecalang pinaka jaya baya desa
2. Wewidangan panyanggrane medudonan manut ring akeh kidik krama gegambelan miwah pekaryan.
3. Prajuru inucap ring ajeng (1) kasudi olih kelihannyane sowang – sowang.

PAWOS 19

1. Swadarma Bendesa miwah Kelihan Banjar sowang – sowang luwire :
 - ha. Ngenterang paparuman desa adat/banjar.
 - na. Ngenterang pengelaksana sedaging awig – awig, pararem – pararem, pasuwara – pasuwara.
 - ca. Ngeraksa saha ngatur tata cara ngangge seraja brana druwen desa/banjar.
 - ra. Nuntun tur ngenterang krama rauhing warga desane mangdane ngamolihang kasukertan sekala niskala.
 - ka. Nuntun saha nyaksinin tata cara miwah sangaskaraning kauripin mabuwat, sane ngelintang sulur pakulawargan.
 - da. Nuntun saha ngenterang iwarga desa/banjar ngupadi nginggilang sang Hyang Agama, kesucian Kahyangan, kesucian pawongan, kesucian palemahan miwah tata caraning ngangge sastra.
 - ta. Mawosin kalih niwakang pamutus marep ring tata cara desane/banjar.
 - sa. Ngewakilin desa utawi banjarnyane matemuwang bawos ring sapisira ugi.
 - wa. Miwah sane sewosan nganutin dresta.
2. Tata cara ngelaksanayang swardarmaning ring ajeng tan dados tiwal, patut anut ring daging awig – awig, pararem, dresta, miwah pemutus- pemutus paruman desa utawi banjar
3. Pengelaksana ring ajeng patut kasobyahang ring paruman desa utawi banjar
4. Bendesa miwah Kelihan Banjar, samakuta natak pamutus paruman desa utawi banjar ngenenin pengelaksana swadarmanyane sowang – sowang.

PAWOS 20

1. Olih – olihan Bendesa miwah Kelihan Banjar luwire :
 - ha. Upon – upon tanah catu.
 - na. Leluputan saking pekenan – kenan.
 - ca. Miwah ulihan – ulihan sewosan manut pararem desa utawi banjar.

PAWOS 21

1. Swadarman prajuru sewosan wantah nyanggra nyarayain Bendesa utawi Kelian Banjar sowang – sowang manut dudonan.
2. Olihan – olihan prajuru inucap, kadi daging pararem desa utawi banjar manut dudonan.

PAWOS 22

1. Bendesa miwah Kelihan Banjar ring sajeroning ngelaksanayang swadarmannyane patut mawirasa ring para pengelingsir, pamekas rikala wenten pakewuh ring desa utawi banjar.
2. Pengelingsir inucap kawenangan mepaweh bawos, pinaka tetimbang ring Bendesa, utawi Kelihan Banjar yadiastun tan kawedi.
3. Mungguwing pawilangan para pengelingsir desa adat manut makuweh banjar pinaka duta sowang – sowang banjar.
4. Makuweh pawilangan para pengelingsir banjar manut paitungan miwah kawigunan sowang – sowang bebanjaran.
5. Pengelingsir ring ajeng kasudi antuk paruman desa utawi banjar nyabran limang warsa tur kasudi malih sawawaning wenten parindikan sane sewosan.

PALET 3

INDIK PARUMAN

PAWOS 23

1. Luwire paruman sane wenten ring Desa :
 - ha. Paruman Desa
 - na. Paruman Banjar
 - ca. Parumkan Prajuru Desa
 - ra. Paruman Sekaa Taruna
2. Sahanan paruman sida kelaksanayang sesampune ketedunin antuk sang patut nyarengin, mejalaran suwaran kulkul saha mabusana nyelempot manut dresta.
3. Ring sahanan paruman patut keriyinan antuk atur piuning ring Ida Begawan Penyarikan maka sarana Widhi Widhana utawi cane.

PAWOS 24

1. Sahanan ayah ngarep miwah ayah balu, patut nyarengin paruman desa miwah banjar, saha wenang mastikayang pamutus.
2. Sahanan ayah sewosan (ayah Deha/Taruna) wenang nyarengin paruman nanging tan wenang mastikayang pamutus.

PAWOS 25

1. Paruman Desa kawentenang sanistane 6 (enam) sasih sapisan, nemoning Galungan.
2. Luwire Paruman banjar kawentenang nyabran asasih manut dresta.
3. Nangken paruman ring ajeng, Bendesa utawi Kelihan Banjar patut nyobyahang pemarginniyane ngenterang desa utawi banjar, pamekas ngenenin indik :
 - ha. Unjuk lungsur adat utawi ayah – ayahan,
 - na. Pemargin penelas miwah sulur arta brana druwen desa utawi banjar.
 - ca. Pemargin usaha – usaha desa/banjar sane mabuwat.
 - ra. Sahanan wicara saha pemutus – pemutusnyane.
 - ka. Daging pararem – pararem miwah pasuwara – pasuwara sane mabuwat.
 - da. Rencana prajuru ngenenin usaha desane/banjare kapungkur.
 - ta. Miwah sane sewosan.
4. Sahanan sane kasobyahang ring ajeng ketitenin saha ketiwakang pamutus antuk paruman desane/banjare.
5. Pamutud paruman inucap ring ajeng, sinangguh sepat siku – siku pamekas antuk prajuru.

PAWOS 26

1. Sewosan sekadi munggah ring ajeng, kawentenannyane prade kawedi olih krama desa sanistane sareng 3 (tiga) banjar.
2. Sang ngawedi patut mastikayang bantang sane sandang bawosang ring paruman inucap.
3. Paruman Desa inucap katiwakang pamutus manut kadi munggah ring ajeng.

PAWOS 27

1. Paruman desa miwah banjar patut ngamedalang pararem – pararem anggen mitegepin awig – awignyane nunggal – nunggal manut dudonan.
2. Daging sahanan pararem satinut ring awig – awig.
3. Sane patut unggahang ring pararem mekadinya :
 - ha. Dewasa ngawitin pemargin bantang daging awig – awig sane mabuwat.
 - na. Rerincikan penyacah daging awig – awig sane mabuwat.
 - ca. Agung Alit danda, panikel – panikelnyane, lan sepatutnyane.
 - ra. Tata sulur ngemargiang awig – awig.
4. Paruman desa wantah sinanggeh pengawisesa sane wenang nyelem putihang tata pangenter desa maut Dresta.

PAWOS 28

1. Paruman prajuru desa patut kawentenang sanistane ngesasih apisan.
2. Paruman inucap katuntun antuk Bendesa.
3. Sahanan prajuru desa wenang tur patut nyarengin paruman prajuru desa
4. Paruman prajuru desa kawenangan wantah ngerincikang tata upaya ngelaksanayang usaha miwah pangerencana sakaluwire.

PAWOS 29

1. Paruman prajuru wenang ngemedalang pasuwara – pasuwara anggen mitegepin daging awig – awig desa.
2. Daging pasuwara patut :
 - ha. Tinut ring daging awig – awig.
 - na. Manut ring agama miwah dresta.
 - ca. Pastika nyantenang agung alit pamidandanyane yan kapurug.

PALET 4

INDIK KULKUL

PAWOS 30

1. Kulkul Desa miwah banjar- bajare tan wenang katepak, yan tan manut kadi daging awig – awig puniki.
2. Tabuh tetepakan Kulkul Banjare pastika masewosan manut tatujonnyane, luwire :
 - ha. Tengeran upakara yadnya desa utawi banjar.
 - na. Tengeran wenten sinalih tunggil warga desa sane seda/padem.
 - ca. Tengeran wenten sinalih tunggil warga desa sane mawiwaha (ngerorod).
 - ra. Tengeran ngawit ngelaksanayang pekaryan manut arah – arah.
 - ka. Tengeran sangkep banjar.
 - da. Tengeran wenten wong kepelegandang.
 - ta. Tengeran ngurungang ngelaksanayang pekaryang.
 - sa. Tengeran wenten sinalih tunggil warga desa kemalingan.
 - wa. Tengeran pancabaya, wenten warga desa ngamuk, begal utawi kabaak/bayi pati, lan sane sewosan.
3. Kulkul desane tan wenang ketepak sejawaning mula wantah tengeran patut katiwakan ring wang desane sami, upami yadnya desa, paruman/pekaryan wong desa segerahan miwah bayapati.

PAWOS 31

1. Kulkul desa miwah banjar tan wenang katepak yan tan sangkaning kabebasanng utawi pituduh kelihan banjar sowang – sowang manut dudonan sejawaning rikala ngewentenang tengeran ngenenin kepancabaya.
2. Sahanan kulkul banjar sewewidangan desa puniki, patut nyarengin katepak, prade wenten sinalih tunggil kulkul banjar/desa nyihnyayang wenten amuk bayapati.
3. Sang neoak tan sangkaning pituduh, patut digelis atur supeksa ring kelihan maka buwatan penepakanne kadi ring ajeng.
4. Suwaran kulkul sekeha sekeluwire ring desa tan wenag nyawurin suwaran kulkul desa miwah banjar.

PAWOS 32

1. Suwaran kulkul tengeran pekaryanan patut katedunin antuk ayahan manut daging dedaunan.
2. Suwaran kulkul tengeran baya patut katedunin sahanan ayah lanang ngarep rawuhing ayah teruna saha gegawan pamitulung anut rupan bayane.

PALET 5
INDIK PRADUWEN DESA
PAWOS 33

1. Sane munggah Druwen Desa sekadi ring sor :
 - ha. Sahananing pelinggih pura rawuhing wewangunan lan sedaging nyane
luwire :
Pura Kahyangan saha labannyane.
 - na. Karang Desa.
 - ca. Tanah Desa.
 - ra. Setra.
 - ka. Setra Ganda Mayu.
 - da. Wewangunan.
 - ta. Lelangon lan sepanunggilin ipun sandang kepastikayang mungguwing
penyucian miwah petangannya.

PAWOS 34

1. Krama desa patut mretiaksayang druwen desa sami manut ilikita ring ajeng.
2. Malih prade wenten druwen desa sne ical sami, sapasira sane memandung utawi maling
keni danda manut pararem saha ngewaliang pepandangan inucap.
3. Yaning prade wenten druwen desa ical, nanging tan wenten ngaku ngambil patut
ngawentenang padewa saksi (macor).

PAWOS 35

Padruwen desa sane merupa Setra luwire :

1. Setra Pesanggaran keemong antuk Banjar Pesanggaran, miwah Banjar Ambengan.
2. Setra Dukuh Pesirahan keemong antuk Banjar Dukuh Pesirahan.
3. Setra Pitik keemong antuk Banjar Pitik miwah Banjar Geladag.
4. Setra Sama keemong antuk Banjar Sama miwah Banjar Geladag.
5. Setra Begawan keemong antuk Banjar Begawan.
6. Setra Pedungan megenah ring Kepisah keemong antuk Banjar Kaja, Banjar Pande, Banjar Karang Suwung, Banjar Kepisah, Banjar Puseh, Banjar Sawah, Banjar Menesa.

PALET 6

SUKERTA PAMITEGEP

KAPING 1

PEPAYONAN

PAWOS 36

1. Yaning wenten sinalih tunggil ikrama desa nandur tanem tuwuh medampingan ring genah parahyangan wiadin paumahan, paembang ipun saking penyengker patut paling kidik adepa agung.
2. Yaning wenten kekatonang kapitahen pacang ngerawuhang baya ring anak sewosan luwire : Ngungkulin, akah ipun ngerusak umah, tembok penyengker, wiadin tembok wewangunan, kekayonan punika kangkat kewarah kepademang sanistanne kesepat gantungan.
3. Prebeyan mademan kekayonan punika, katawur olih sang ngewarah.
4. Yaning sang madruwe kekayonan tan nyuken kewarah, sang ngewarah wenang nunas upasaksi ring bendesa/kelihan.
5. Wangken ikang kekayonan, kesukserahan ring sang maduwe.

KAPING 2
WEWALUNGAN
PAWOS 37

1. Sahaning warga desa sane miara sakaluwir wewalungan, patut sayaga nitenin negul utawi ngelogorin mangda ubuh – ubuhanne tan wenten ngerusakin karang utawi abian anak sewosan, bilih – bilih mangda sampunang jantos ngeranjing/ ngeletehin kahyangan.
2. Prade wenten wewalungan ngeleb saha ngeranjing ring pekarangan sewosan, sang madruwe karang patut melungguhing ring sang nruwenang wewalungan. Bilih – bilih yan ngawenang wenten kerusakan, keduluran antuk nunasang bawos ring kelihannyane, mangda ketiwakang pamidanda agung alit manut dedosane.
3. Bilih asasih jantos ping tiga sampun malungguhan wewalungan wenang ketaban. Ketaban punika patut nguningan/mesadok ring kelihan banjar, sane ngicen pemargi manut tata cara.
4. Wewalungan ketaban inucap wenag katebus olih sang nruwenang, agung alit penebusan ketiwakan antuk kelihan.
5. Bilih ring asasih jantos ping tiga mataban kadi ring ajeng, wewalungan wenang kedanda sepengargan wewalungan inucap, pemargin naban punika melarapan antuk kelihan banjar.

PAWOS 38

1. Prade wewalungan ngeleb ngeranjing kekahyangan, sang madruwe wenang kesisipang antuk danda prebeaning Upakara Pamarisudha sepatute.
2. Tata cara melungguhan neban miwah nabas, pateh kadi munggah ring ajeng.
3. Prade ngeletehin genah suci sesampune kaparittas olih prajuru, sang medrebe patut keni pamidanda manut pararem tur kepatutang ngupakara kahyangan inucap manut pararem.
4. Tan kewenang ngangonang utawi negulang wewalungan ring genah – genah ring sor puniki :
 - ha. Genah – genah suci rawuhing pekarangan wewangunan desa.
 - na. Margi agung rurung desa.
 - ca. Pekarangan desa mungguwing telajakan desa.
 - ra. Setra.

KAPING 3
DUSTA LAN BAYA
PAWOS 39

1. Sahanan warga desa prade uning ring jadma melaksana dusta, patut digelis utawi premangkin atur uning ring prajuru desa/banjar.
2. Laksana sane sinanggeh dusta miwah baya kecaping ajeng luwire bacakan ipun :
ha. Jiwa Baya
na. Arta Baya
ca. Geni Baya
ra. Er Baya
ka. Pelegandangan Pemekas
ta. Duracara Ring Agama
3. Bilih mabuwat kewentenang ipun, sang uning inucap patut digelis nyuarayang kulkul anut ring rupan pengelaksanaan dustane.

PAWOS 40

1. Sahanan warga desa prade uning ring kewentenang baya utawi penangkan baya, patut pramangkin matur uning ring prajuru.
2. Bilih mabuwat kewentenang ipun, sang uning patut digelis nyuaryang kulkul Banjar,
3. Baya utawi penangkan baya, munggah ring ajeng, upamina umah puun, belabar.

PAWOS 41

1. Sahanan warga desa sane katiben baya patut digelis tur supeksa ring prajuru utawi sang wenang mawosin.
2. Sahananing warga desa sane uning wenten jadma melaksana dusta patut digelis supeksa ring prajuru utawi sang wenang mawosang.
3. Yan prade katiben baya inucap, wenang digelis nyuarayang kulkul tur supeksa ring iprajuru utawi kauningang nunas patulung ring guru wisesa.

PAWOS 42

1. Warga desa sane kaicalan/sane kemalingin prade pacang meserep patut nunas leluputan miwah panuntun kelihan banjarnyane.
2. Prade genah meserep ngelangkungin banjar sewosan, patut nunas kebebasan utawi uwak – uwak ring kelihan banjar irika.
3. Kelihan inucap ngicenin panuntun mangda tatacara meserep manut kadi dresta.

PAWOS 43

1. Sahanan warga desa prade polih nemu barang sane wenten sajeroning wewidangan desa, patut atur uninge ring kelihan banjarnyane.
2. Kelihan banjar inucap nyiarang barang tetemuan punika, mangda sang meduwe sida mewantu ngemolihang barangnyane. Sang mariangken patut ngawentenang cihna marupa bukti mungguwing barang – barang punika mula wantah padruwennya.
3. Prade asasih tan wenten jadma ngelingang wenang kasukserah ring Guru Wisesa,

KAPING 4

PENYANGGRAN BANJAR

PAWOS 44

1. Pekaryan druwen sinalih tunggil krama desa sane mabuwat, tata penyanggrannyane kesukserahang ring banjarnyane sowang – sowang.
2. Banjar wenang ngardi awig – awig ngemanggehang tatacaranya nyanggra pekaryan kramane munggah ring ajeng.
3. Penyanggran patut medarsana antuk arsa pramatulung ring sang mekarya, nanging tan maren miteketin kramane ring banjar muwah desa.
4. Bilih karyane dahat abot, banjare wenang ngeruruh penampih ring banjar sewosan.
5. Pakaryan sane patut kesukserahang ring penyanggran banjare luwire :
 - ha. Ngupakara sawa jantos pengabenan, yadiastun tanpa sawa.
 - na. Sahanan yadnya sewosan.
 - ca. Pakaryan sewosan manut awig – awig banjar, upami ngisidang sakeluwir wewangunan/bale, jineng lan sane sewosan.

PAWOS 45

1. Awig – awig banjar ring ajeng, tan kengin kelaksanayang sadurungan kececirening antuk Bendesa.
2. Daging awig – awig inucap patut tan maren ngadungang mungguwing wibuh kincit pakaryane ring agung alit panyembraman ring banjar.

CATURTAS SARGAH SUKERTA TATA AGAMA PALET 1 INDIK DEWA YADNYA PAWOS 46

1. Ring wawengkon Desa Adat Pedungan kewntenang pemangku sane pacang ngastawayang nuntun sahaning pengastawa ring pura inucap :
 - ha. Wiwitan wewintenannya sang dados Pemangku :
 - 1) Mawiwit saking lelintihan pemangku.
 - 2) Wenang nyanjan utawi nunas bawos ring natar pura
 - 3) Kererehin olih ikrama desa tur melarapan suwara gilik seguluk.
 - na. Sane tan wenang dados Pemangku luwire :
 - 1) Sane Ceda Angga.
 - 2) Sang Amumpang Paraning Laku.
 - ca. Pawintenannya kepuputang oleh sang Sulinggih.

Yan sampun wus pewintenannya, wenang ngerangsuk gegelaran pemangku tur tan ngelempasin linging Sastra lan Agama.
2. Yan prade pemangku sane marep keni kapialangan jantos tan prasida ngemargiang upacara ring pira, patut upacara kemargiang olih pemangku desa sane sewosan utawi dados nuur Sang Sulinggih.
3. Yaning wenten Pemangku keni ujar ala,ulah ala, pemangku inucap patut kaprayascita manut agama.

PAWOS 47

1. Sahaning krama desa patut nureksain raga mangda kesukertan kahyangan polih kesucian.
2. Sane tan kalugra ngeranjing ke Pura :
 - ha. Sang kesinanggeh cuntaka / sebel.
 - na. Sang kesinanggeh petite sadurunge kaprayascita.
 - ca. Sato ageng sejawaning rikala mepepada.
 - ra. Mabusana sane tan patut manut tata susila lan Agama Hindu.
 - ka. Sang sane melaksana kesinanggeh leteh manut agama.
 - da. Sahananing sane tan kepatutang manut pararem.
 - ta. Sengker cuntaka sekadi ring sor :
 - 1) Ngeraja suwala selami ring ngeraja suwala.
 - 2) Ngembasang putra, 42 (petang dasa dua) rahina ngawit saking putrane embas, utawi jantos sampun keupakara mekekambuhan tur kaprayascita manut agama, yan sane lanang akepusin udel.
 - 3) Keruron 42 (petang dasa dua) rahina ngawit saking keruron.
 - 4) Sang nyambut karya Pitra Yadnya, Cuntakanya ngawit ngulapin rauh riwus yadnyannya.
 - 5) Rikala nyambut karya piodalan desa, sane polih pawilangan sebel wantah sang ngarepin kewanten.
3. Sane tan keni cuntaka sesebelan sekadi ring sor :
 - ha. Ida Sang Sulinggih.
 - na. Para Pemangku Kahyangan.

PALET 2
INDIK RESI YADNYA
PAWOS 48

1. Sang pacang mapodgala utawi madwijati, patut polih panugrahan saking Parisada Hindu Dharma lan Kantor Agama, macihna sang mapodgala inucap sampun wus katitenin, katureksain indik sahanan kawentenannya pangeweruh lan pawongannya tan ngalempasin sekadi kecap sastra, dresta, sulaksana, kawuruhang manut agama lan sesana sane kemargiang.
2. Prajuru patut nitenin mungguwing kawentenannya, angalem laksana sang pacang mapodgala, mangda jati tan lempas ring kecaping agama.
3. Yan prade lempas ring kecaping agama, iprajuru wenang ngarerenang.
4. Risampun puput upakarnya tur nabeh Ida sampun mapica parab, iprajuru wenang ngawedarang indik lan pemargin Sang Putus Madwijati.
5. Sang mawinten sane pacang ngemargiang nyonteng, dalang, ngusadanin patut masadok ring prajuru, iprajuru wenang ngawas nitenin kawentenannya, tur nyaksiang upakarannya selanturnya iprajuru wenang ngawedarin indik tatujon pemargin sang inucap rawuhing wates wawidangannya. Prade lempas ring kecaping agama iprajuru wenang ngandeg upakarnya.
6. Ida sang putus sane keadegang pinaka Guru Loka Palasraya antuk desa kapatut sekadi ring sor :

ha. Upacara Padiksan lan Pretiwan Ida riwekas kelaksanayang antuk

krama.

na. Pinaka panuntun ikrama desa ring indik tatwa lan upacara agama.

ca. Muputang upakara ring kahyangan utawi upakara ring ikrama desa.

ra. Pinaka Kerta Desa patut matetiwak pangaksara, prayascita ring sang duskerthi.

ka. Krama pinih singgih genah Ida tur patut katurang Pangrsi Bojana. ‘

da. Tan patut muputang upakara yadnya sane kantun ring sajeroning wicara.

PALET 3

INDIK PITRA YADNYA

PAWOS 48

1. Sahananing pamreteka sang lampus kabawos Pitra Yadnya sekadi : mersihin sawa, mendem, ngeseng, atiwa – tiwa kalanturang antuk pangeramas rawuh ngalinggihang ring parahyangan.
2. Mendem sawa utawi ngeseng :
 - ha. Genah mendem ring setra ugi.
 - na. Ida Sang Sulinggih wenang polih linggih atiwa – tiwa manut dresta.
 - ca. Pemargin padewasan mendem utawi atiwa – tiwa, taler kapidabdabin nganutin Desa Kala Patra, pangutangannya nganutin Wariga, Dresta, Purnama, Tilem, Pujawali ring Kahyangan Tiga, tan kalugra mendem.
 - ra. Yan wenten ikrama ring wewidangan desa sane padem nemoning pakiyisan, panyejeran, ngesanga nenten pisan kalugra mendem sawa.
 - ka. Yan dipradene wenten, pamendeman punika kelaksanayang ring kala tengahing latri nemoning rahina penyepian.
 - da. Nemoning pujawali ring Kahyangan Tiga, nenten pisan kadadosang mendem sawa.

3. Prade lampus sangkaning salah pati, ulah pati kengin patut kabakta budal, pemratekannya wantah abersihan, tur kasanggra olih banten pangulapan lan panebusan, wus punika patut pendem sajawaning pramangkin, riwusan asasih pitung rahina wenang kapreteka patut bebantenannya.
4. Yan hana wong pawestri mobot lampus, tan wenang kapendem sadurung bobotannya embas.
5. Prade wenten wong padem ring carik, tegalan, sang madruwe kapatutang utawi waris, patut keni pamrayascita lan pecaruan sealitnyane amanca warna tur kelaksanayang ring genah inucap masengker asasih pitung rahina.
6. Yan hana ngangkenin sang padem inucap ring ajeng tan keni elingan wenang katur ring sang ngawa rat, mungguwing upakara pamrayascita ring desa kelaksanayang olih ikrama desa.
7. Yan wenten sane padem patut nguningang ring Bendesa mangda sampunang ngelangkar watang.
8. Bacakang sane dados keaben :
 - ha. Sane sampun mayusa akupak.
 - na. Sawa sane tan kabawos leteh.
 - ca. Sane durung akupak kapatutang ngelungah.
 - ra. Sawa sane kabawos leteh wenang kaabenan riwus sengker ipun kaprayascita manut kecaping Agama.

PALET 4
INDIK MANUSA YADNYA
PAWOS 50

1. Manusa Yadnya inggih punika upakara dharmaning manusa, ngawit saking patemoning kama bang kalawan kama putih, sajeroning garba, wesananing Ibu, jantos lampus riwekas.
2. Upakara ring ajeng luwire :
Magedong – gedongan, ritatkala rare wawu embas, kepus udel, tutug kambuhan (42) rahina, rare mayusa tigang sasih, rare mayusa aweton mapetik rambut, tutug kelih mapandes, mawinten, mawiwaha.
3. Upacara ring ajeng inucap nganutin kecap agama : nista, madia lan utama, pemarginnyane nganutin dresta sumacara ring desa.

PALET 5
INDIK BHUTA YADNYA
PAWOS 51

Bhuta Yadnya inggih punika sahananing upacara pabyakala ring Pertiwi lan Kahyangan muah sarwa Bhuta Kala.

PAWOS 52

1. Upacara pabyakala ring sarwa prani luwire :
Sarwa tumuwuh ring tumpek wariga, sarwa ingon – ingon ring tumpek uye.
2. Upakara pabyakala ring Pertiwi miwah Kahyangan lan sarwa Bhuta kabawos mecaru luwire : Yadnya Sesa (ngejot rikalaning wus meratengan), Eka Sata, Manca Sata, Manca Sanak, Pamalik Sumpah, Rsi Ghana, Tawur Kesanga.

PAWOS 53

1. Sajeroning munggah ring ajeng malih pabyakalan marep ring manusa manut wigunanyane.
2. Malih ring Tilem Kesanga kawentenang Tawur Kesanga ring desa tur prajuru patut nunas tawur ring alun – alun.
3. Rikala sasih kanem kawentenang Caru Panca Sato kadulurang Kucit/Celeng butuan ring perempatan agung desa.
4. Upakara Tilem Kesanga patut kelaksanayang sekadi ring sor :
 - ha. Ring Bale Agung kawentenang pecaruan jagat, agung alit pengambilanne nganutin Desa Kala Patra sane sampun kelaksanayang Guru Wisesa.
 - na. Ring sowang – sowang paumahan nganutin tatiwak Guru Wisesa.
 - ca. Nyoreang ngawentenang pengerupukan tur kapidabdab olih prajuru.
 - ra. Ring rahina penyepian patut kemargiang, ngemargiang brata penyepian sekadi : Amati Geni, Amati Karya, Amati Lelungan, Amati Lelungan.
 - ka. Pemargin brata sane kawentenang Desa Kala Patra, saha katuntun olih prajuru utawi sang sane kasudi.
 - da. Rahina benjangnyane sampun ngembak geni.
 - ta. Ring rahina ngembak geni mapiteges pengelukaran brata semadi sowang – sowang krama patut nunas pangaksama ring kadangnya macihna pangawit dewasa I warsa Icaka.

PANCAMAS SARGAH
SUKERTA TATA PAWONGAN
PALET 1
INDIK PAWIWAHAN
PAWOS 54

1. Pawiwahan inggih punika : penunggalan purusa lan pradana (lanang istri) malarapan antuk upasaksi sakala lan niskala.
2. Pidabdab pawiwahan ring desa, ngemanggehang pemargin purusa kapatut sang purusa ngalap rabi tur kapaumahang ring sang purusa.
3. Pemargin pawiwahan wenten polah – palih nyane luwire : ngerangkat, nyeburin, ngangkat sentana, pepadikan.
4. Pidabdab pacang mawiwaha luwire :
 - ha. Sane sampun munggah deha truna.
 - na. Sangkaning suka cita lan tan keparikosa.
 - ca. Yan ngambil tiyosan agama patut kariyinin antuk banten penyambutan.
 - ra. Nganten kecaping agama.
 - ka. Mangda nganutin daging Undang – undang Perkawinan sane kawentenan antuk sang ngawerat.
 - da. Yan tan satinut sekadi kecape ring arep tan kasinanggeh sah.

PAWOS 55

Tata cara perabian ring Desa Adat :

1. Sang pacang merabian ngewarangan kulawargannyane, mesadok ring Kelihan Banjar.
2. Pemargin indik pepadikan :
 - ha. Mekruna ping tiga luwire : ngidih ping kalih, pengambilan.
 - na. Rikalaning pengambilan, warga sang pradana lan purusa ngerawuhing Kelihan Banjar pinaka Saksi.
3. Prade ngerangkat, ngerorod sang sane ngambil, ngemargiang sekadi ring sor :
 - ha. Mapasadok tan kasepan awengi.
 - na. Ngewentenan pengelukuan (ping tiga) manut tata cara, saha dulurannya.
4. Nyeburin, sira sane ngemargiang, sang lanang meraga luh, yan ipun medruwe sentana, sentanane punika dados purusa pradana.
5. Tigang sasih sadurung pengangkatan memargi, patut kewentenang war – war ring Desa Adat.

PAWOS 56

1. Sang kaicalan anak istri yan durung wenten pesadok sejeroning awengi, patut di gelis mesadok ring Kelihan, nunas pamitulung pacang meseserep.
2. I Kelihan ngenterang pemargin meseserep tur manda nganutin tata cara kramaning desa.
3. Paseserepe patut sesampue polih pewarah – warah I Kelihan Banjar.

PAWOS 57

1. Manut Undang – undang Perkawinan sane kesungkemin sang lanang, patut merabi asiki sejawaning wenten pasubaya sane sampun kewehin antuk rabine sane pinih riyin.
2. Yan wenten Jadma istri deha mabot, patut digelis kesadokang ring Kelihan Banjar tur digelis kejangkepang antuk I Kelihan Banjar ring sane mobotin.
3. Prade tan wenten sane ngangkenin bobotan sang mobot, kulawargan nyane patut keni pamrayascita ring desa tur keupakara rarene manut agama.

PAWOS 58

1. Pawiwahan ring sang lian agama patut keparisudha riyin ngangge upakara pemijilan senistannyane, ngambuanin, ngotonin, raris mewidi widana.
2. Yan wenten sang melaksana asapunika, prajuru banjar wenang mawosin, yan nenten ngemargiang piceket prajuru, sengker nyusul tigang sangkepan ring banjar adat wiadin desa adat, kabawos tan satinut ring pawiwahan manut Agama Hindu.

PALET 2

INDIK NYAPIHAN

PAWOS 59

1. Sang wus merabian palas, tan sida satinut alaki rabi, kabawos nyapihan. yan wus merabian sangkaning lina kabawos balu.
2. Sang pacang nyapihan sesampune keesahang antuk Guru Wisesa, wenang kewedarang ring desa adat uatwi banjar.
3. Prade riwekas sang nyapihan malih adung, patut malih mawiwaha.

4. Balu luh katinggal lampus antuk suaminyane utawi balu sane pecak menyeburin, patut ngemargiang swadarma sekadi ring sor :
 - ha. Ngemargiang kepatibrata.
 - na. Ngemargiang sahanan ayah krama.
 - ca. Ngeraksa tur nguasayang tur miara sahanan wewarisan lan sentanannya
 - ra. Tan dados ngadol wewarisan sadurung polih wewakang saking kulewargan nyane purusa.
 - ka. Wenang malih mawiwaha yan sampun kepigumin antuk oka deha teruna lan kulawarga kapurusa.
5. Balu sane tan pageh ring swadarmannyane luwire :
 - ha. Matingkah dratikarma muah sane sewosan.
 - na. Matilar tan pasadok ngantos lintang 6 sasih.
 - ca. Lampus ring swadarmaning balu tur salah prawerti.
6. Balu sane tan pageh sekadi ucapan ring arep, wenang kaulihang olih kulawarganya, kepurusa saha tan polih pahpahan.
7. Prade wenten balu tanpa sentana, keulihang olih kulawarga purusa, patut polih pah – pahan paguna kaya.

PALET 3

INDIK SENTANA

PAWOS 60

1. Yan wenten parabian tan manut jantos ngametuang sentana, mangde tan kaucap astra utawi bebinjat patut kamenggala antuk upakara.
2. Prade pawiwahan tan ngametuang sentana, kengin ngidih sentana peperasan.
3. Yaning wenten ikrama sinalih tunggil jagi ngangkat sentana, patut ngemargiang arta brana saha kesaksining sakala niskala.
4. Sapa sira ugi sane ngidih sentana, patut dumun mapesadok ring Kelihan Adat, risampune polih ingkup bawos saking kulawargannya miwah sane keangkat.
5. Kelihan Banjat Adat mapesadok ring Bendesa.
6. Kelihan Banjar Adat digelis nyiarang ring ikrama banjar sami, sane rumaksa tan lila, patut nyadokang ring I Bendesa sajeroning tigang sasih.
7. Bendesa mawosin utawi ngicenin pemutus manut sekadi kewentenannya.

PAWOS 61

Sane patut kaperas anggen sentana sekadi ring sor :

1. Sane kaperas atut sane megama Hindu.
2. Saking waris pancer kapurusa.
3. Sinalih tunggil mawiwit saking kulewarga tunggal sanggah utawi merajan, paibon lan dadya.
4. Yaning tan wenten kapusura, kengin mawiwit kulewarga sapa sira ugi.

PALET 4

INDIK WARISAN

PAWOS 62

1. Sane kasinanggeh warisan inggih punika, tetamian arta brana saha ayah – ayahan, ngupadi sukerta sakala niskala saking kaleluhurannya arep ring tetamian luwire :
ha. Duwe tengah, karang paumahan, pemerajan.
na. Paguna kaya, tatadan, jiwa dana lan utang piutang.
2. Wawu kengin kabawos warisan :
ha. Wenten sang maputurun warisan.
na. Wenten turunnya utawi ahli waris.
ca. Wenten arta brana miwah tetegenan utawi ayah – ayahan merupa wewarisan.
3. Sane kabawos waris inggih punika :
ha. Pretisentana lanang.
na. Sentana rajeg.
ca. Sentana paperasan lanang, uatawi wadon.

PAWOS 63

1. Swadarma waris patut menerima saha ngutsahayang tetamian ayah – ayahan saking leluhurnya, mekadi ngrempon Sanggah, Pura, Pura Dadya, Pura Kahyangan saha pekarangannya.
2. Ngabenang sang kewaris saha ngelanturang upakara pitra yadnya sepatutnyane.
3. Nami utang – utang sang kewarisin pemekas utang ring desa, wiadin pura lan utang sane sewosan.

PAWOS 64

Prade wenten karang warga desa keputungan warga, I Bendesa utawi kerta desa

adat mawosang tur nuriksa sila – silanya saha nibakang punika ring :

1. Waris saking kapurusa.
2. Papernah kesamping, yaning wenten paumahan waris ngemanggehang.
3. Yaning tan wenten sekadi kecaping arep, wawu kengin katiwakang ring sang tan medrebe tanah paumahan, sane kesinangguh krama arep, mapitunggalan desa, muah meagama Hindu, Sang ketiban karang punika wenang mapreteka sang pecak medrebe karang inucap, wenang polih wewarisan.

SAD SARGAH

WICARA LAN PEMINDANDA

PALET 1

INDIK WICARA

PAWOS 65

1. Sane patutmuputang wicara ring desa adat, inggih punika sang kapianggehang Bendesa.
2. Pamutus indik kebawos nganutin daging awig – awig, pangelingsir desa lan pamikukuh desa.
3. Prade indik wicara tan prasida molihang pamatus olih Bendesa, kengin numusang ring sang rumawos.
4. Yan wicara inucap tan prasida molihang pemutus ring desa adat taler ring sang rumawosang, wicara punika tan kemanutang.

PAWOS 66

1. Sahananing wicara sane ngametuang laksana corah, baya, nungkas ring awig – awig, sane kabawos angusak-asik desa adat, patut kebawosang antuk I Bendesa, tur keni pamidanda manut pararem.
2. Semaliha yan wenten sinalih tunggil ikrama desa, wicara ngawenggara wiadin ngewentenang bawos kawon, ngawetuang manah sungsut ring anak siyosan patut digelis kebawosin antuk Bendesa sesampune wenten nyadokang.
3. Pamutus pastika, nyantenang keiwangan nyane uatwi tan lempas ring daging awig – awig desa adat.

PALET 2

INDIK PEMIDANDA

PAWOS 67

1. Desa adat wenang nibakang pamidanda ring krama sane sisip.
2. Pamidanda punika seluwire :
 - ha. Ayah – ayahan.
 - na. Danda arta.
 - ca. Pengupakara lan pengaskara.
 - ra. Ngewaliang tanah pekarangan Desa.

SAPTAMAS SARGAH

NGUWAH – NGUWUHIN AWIG – AWIG

PAWOS 68

1. Nguwah – nguwuhin awig – awig, patut kelaksanayang antuk paruman deda adat.
2. Paruman pakraman punika patut melarapan antuk segilik seguluk.
3. Pemutus bebawosan prasida sampun kramane sagilik saguluk utawi keanggen mejalaran pasuwara.
4. Yan mejalaran antuk wewilangan suwara, guatnya sekadi ring sor :
ha. Krama desa sanistannya kalih banjar sahananing sane tan rawuh.
na. Wewilangan suwara sane nganutin sanistannya kalih banjar saking wewilangan – wewilangan suwara parum.

ASTAMAS SARGAH

PAMUPUT

PAWOS 69

1. Awig – awig puniki kawastanin awig – awig Desa Adat Pedungan.
2. Awig – awig puniki kemargiang ngawit saking antuk krama Desa Adat Pedungan.
3. Awig – awig Desa Adat Pedungan ngenenin sahanan warga lan krama Desa Adat Pedungan, sahanan sane kewawa antuk Desa Adat Pedungan.
4. Awig – awig Desa Adat Pedungan puniki manggeh tulis kelaksanayang ring wewidangan Desa Adat Pedungan.

PAWOS 70

Seluwiring pemargin Adat durung kebawos uatwi durung mungguh sajeroning awig – awig puniki mungguh, kelaksanayang manut tata cara sane sampun ketah memargi kadulurin antuk pasuwara utawi perawos.

PAWOS 71

1. Awig – awig puniki keraremin duk rahina pararem krama Desa Adat Pedungan ring rahina Sukra Wage, Wuku Wariga, Purnamaning Ketiga, Caka 1908, Tanggal 19 – 09 – 1986.
2. Awig – awig puniki kalingga tanganin antuk Prajuru Desa Adat Pedungan lan kesaksinin antuk Prajuru Banjar Adat, saha Bupati Kepala Daerah Tingkat II Badung maka sudha pamikukuh.
3. Luwir pengelingga tangan :

PRATAMAS SARGAH

PARAREM PENYACAH AWIG

Pararem Penyacah Awig – awig Desa Adat Pedungan sane kasumanggem inggih punika :

1. Swadarma lan tategenan krama nginutin dresta. Tur prade cedok sang sangkaning tan kapiambeng patut keni dosa. Sane mapiteges panukun ayahan. Panukun ayahan sane katibenin ring krama sane nginutin swadarma punika manut pararem banjar sane polih nyanggra.
2. Piodalan ring Pura Kahyangan Tiga, prabeya upakara piodalan kamedalang saking Kas Desa Adat Pedungan, pikolih saking upon – upon / usaha desa lan sane tiyosan.

Penyanggra upakara kelaksanayang olih banjar, inggih punika :

ha. Ring Pura Desa kesanggra olih 14 (pat belas) Banjar minakadi :

Banjar Karang Suwung, Banjar Kepisah, Banjar Pande, Banjar Kaja, Banjar Menesa, Banjar Puseh, Banjar Sama, Banjar Sawah, Banjar Begawan, Banjar Pitik, Banjar Geladag, Banjar Dukuh Pesirahan, Banjar Ambengan, lan Banjar Pesanggaran.

na. Ring Pura Puseh kesanggara olih 13 Banjar minakadi :

Banjar Karang Suwung, Banjar Kepisah, Banjar Pande, Banjar Kaja, Banjar Menesa, Banjar Puseh, Banjar Sama, Banjar Sawah, Banjar Pitik, Banjar Geladag, Banjar Dukuh Pesirahan, Banjar Ambengan, lan Banjar Pesanggaran.

ca. Ring Pura Dalem Pakerisan kesanggra olih 7 Banjar minakadi :

Banjar Karang Suwung, Banjar Kepisah, Banjar Pande, Banjar Kaja, Banjar Menesa, Banjar Puseh, Banjar Sawah.

1. Upacara pecaruan sasih kanem kelaksanayang ring pempatan Desa Adat Pedungan. Kasanggra olih 3 (tigang) banjar : Banjar Kaja, Banjar Pande lan Banjar Menesa. Prabeya upakara inucap kamedalang saking Desa Adat.
2. Indik ngadegang Bendesa Desa Adat Pedungan, manut kadi pikarsan Paruman Desa, nyabran 5 (limang) warsa apisan (Palet 2 Pawos 17 wiwit 3).

3. Prajuru Desa ripet prade keni kelabubaang, saking desa adat ngewantu sakasidan.
4. Pemangku Gede Pura Kahyangan Tiga lanang istri, ripet dane kelayusekaran utawi lampus sekantun dane ngaturang ayah, mangda keabenang manut sekadi kecapin sastra agama. Indik prabeya upakara paletan karya “Mapranawa” kamedalang olih Desa Adat.
5. Krama tamiu lan tamiu sane sampun maduwe paumahan utawi genah jenek ring wewidangan Desa Adat Pedungan keni, dana pamarisudha pawongan lan palemahan akuweh ipun pengargan beras Bali 100 Kg. Dana puniki ngeranjing 60% ring banjar, 40% ring Desa Adat. Kawigunan ipun nyanggra pidapdab. Nyuciang jagat/Desa Adat sekala niskala lan prade wenten pakibeh jagat ngerastiti sedaging ipun mangda ngemanggihan kerahayuan.
6. Krama tamiu lan tamiu sane sampun maduwe paumahan utawi genah jenek ring wewidangan Desa Adat Pedungan keni dana Jagabaya nyabran sasih akuweh ipun manut pararem banjar sowang – sowang.
7. Sapasira ugi sane ngewangun paumahan (pengembang/kaplingan) ring wewidangan Desa Adat Pedungan keni pemogpog palemahan akuweh ipun sapengargan beras Bali 100 Kg sebilang are. Dana punika ngeranjing 60% ke Banjar, 40% ke Desa Adat.

DWITYAS SARGAH
PARAREM PANGELE

Pararem Pangele Desa Adat Pedungan sane sampun kasumanggeman riin lan sane pacang kemargiang :

1. Indik kruna “ADAT” sane kasurat ring bantang awig – awig Desa Adat Pedungan.
Kagentosin krunan ipun dados
2. Indik kruna utawi wilangan “SARGA” sane kasurat ring Awig – awig Desa Adat Pedungan kasampurnayang manut uger – uger. Inggih punika :
Sarga I kasampurnayang dados : PRATAMAS SARGAH
Sarga II kasampurnayang dados : DWITYAS SARGAH
Sarga III kasampurnayang dados : TRITYAS SARGAH
Sarga IV kasampurnayang dados : CATURTHAS SARGAH
Sarga V kasampurnayang dados : PANCAMAS SARGAH
Sarga VI kasampurnayang dados : SAD SARGAH
Sarga VII kasampurnayang dados : SAPTAMAS SARGAH
Sarga VIII kasampurnayang dados : ASTAMAS SARGAH
3. Prajuru Desa rikala ngelaksanayang ayah – ayah ring Desa kaabih lan kesanggra antuk :
ha. Prajuru Widya Sabha. Kaadegan olih Bendesa sane maduwe swadarma nitenin
indik Dharma Gita, Dharma Widya lan Dharma Wecana.
na. Pecalang Desa sane kasudi saking sowang – sowang banjar ngemargiang ayah –
ayah nitenin indik kasutreptining krama desa.
4. LPD wantah silih sinunggil padreben Desa Adat sane gumanti ngalanturang kawentenan
adat Budaya Bali lan wewangunan ring Desa Adat.

5. Sapasira ugi tan kadadosang ngawenang cemer ring wewidangan palemahan desa minakadi :
 - ha. Usaha sablon, usaha maubuh – ubuhan :

Usaha inucap patut katutup turmaning keni pamidanda, akuwehnyane sapengarga beras 100 Kg. Dipradene mamurug, usaha inucap pastika kaurungan olih krama Desa.
 - na. Ngutang wangke wewalungan, ngutang luhu katukade lan ngutang luhu tan manut ring genah sane kasudi, patut keni pamidanda, akuwehnyane sapengarga beras 50 Kg. Sane ngemanggihin tur mesadok ring prajuru polih olih – olihan pah kalih pamidanda.
6. Sapasira ugi tan kalugra ngontrakang pekarangannyane sane jagi keanggen mausaha sablon, pradene wenten sekadi inucap olih – olihan nyane jagi kaambil desa. Dana punika ngeranjing 60% ke banjar, 40% ke desa adat.
7. Krama Tamiu sane pacang maturan ke Pura Kahyangan Tiga, patut masadok ring Jro Mangku Gede.
8. Sapasira ugi tan kalugra ngaryanin genah sane ngawetung cemer desa, minakadi :

wisma asusila.

TRITYAS SARGAH

PARAREM PENEPAS WICARA

Pararem Penepas Wicara ring Desa Adat Pedungan rauh mangkin durung wenten wicara sane patut kaunggulan ring Pararem Penepas Wicara.